

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

1. प्रधानमंत्री नरेन्द्र मोदी होर कल 6 जून गी कटड़ा ते श्रीनगर बश्कार दऊं वंदे भारत ट्रेनें गी झंडी दस्सियै रवाना करगंन। श्री मोदी होर चनाह पुल ते अंजी खड्ड पुल दा बी उद्घाटन करगंन। प्रधानमंत्री हुंदे दौरे लेई सुरक्षा दे व्यापक इंतजाम कीते गेदे न।
2. जम्मू श्रीनगर वंदे भारत ट्रेनें दे समें दी घोषणा कीती गई।
3. उपमुख्यमंत्री होरें जीएमसी सुपर स्पैशिएलिटी अस्पताल च सेहत सेवाएं दा जायजा लैता।
4. जम्मू कश्मीर सरकार नै जनवरी 2025 थमां कर्मचारिणं लेई डीए बधाइयै 50 फीदी कीता।
5. जम्मू मुनिसिपल कारपोरेशन श्री अमरनाथ यात्रुणं दे सुआगत लेई तैआर। कमीशनर होरें सुविधाएं ते सफाई सरबंधी उपाएं दा जायजा लैता।

<><><><><><>

PM JK Visit

प्रधानमंत्री नरेन्द्र मोदी होर कल 6 जून गी श्री माता वैष्णो देवी जी दे आधार शिविर कटरा थमां कश्मीर लेई रेल सेवाएं दा उद्घाटन करडन। कटरा ते बारामूला बश्कार चलने आहली वंदे भारत एक्सप्रेस ट्रेन केई सुविधाएं कन्नै लैस होग ते एह्दे राहें जम्मू थमां श्रीनगर लेई पैहली बारी सिद्धा रेल संपर्क बी उपलब्ध होई जाह्ग। श्री मोदी होर रेल राहें चिनाब पुल थमां कटरा औडन ते इस दरन ओह दुनिया दे सभ्भनें शा उच्चे रेलवे पुल ते अंजी खड्ड आहले पुल दा बी उद्घाटन करडन।

<><><><><><>

Vande Bharat Train

जम्मू कश्मीर च रेल संपर्क गी होर तगड़ा करने गी दिक्खदे होई रेलवे मंत्रालय नै जम्मू तवी ते श्रीनगर बश्कार चलने आली नमीं वंदे भारत एक्सप्रेस सेवा दी औने जाने दा समें दा टाइमटेबल पेश कीता ऐ। आकाशवाणी दे जम्मू संवाददाता नै जानकारी दित्ती ऐ जे सैमी हाई स्पीड वंदे भारत रेल सीमित ठैहराह उप्पर चलगंन ते जम्मू तवी, श्री माता वैष्णो देवी कटड़ा, बनिहाल ते श्रीनगर इनें चऊं स्टेशनें उप्पर गै रूकोग। रेल मंत्रालय दी अधिसूचना मूजब इस रस्ते लेई दऊं वंदे भारत ट्रेनें गी मंजूरी दित्ती गई ऐ। एह ट्रेनां हफते च 6 दिन चलगंन, जिंदे चा इक दिन रख-रखाह लेई आरक्षत रखेआ गेदा ऐ।

<><><><><><>

DyCM Hospitals' visit

उपमुख्यमंत्री सुरिंदर चौधरी होरें जम्मू दे सरकारी मेडिकल कॉलेज अस्पताल ते सुपर स्पैशिएलिटी अस्पताल दा व्यापक निरीक्षण करियै मरीजें गी दित्ती जा'रदी सुविधाएं ते जारी कम्में बारै जानकारी हासल कीती। इस मौके उपमुख्यमंत्री होर कैंसर केयर युनिट ते कार्डिऐक केयर युनिटें च बी गे जित्थे उ'नें ढांचागत सुविधाएं, उपकरणें, मरीजें गी दित्ती जा'रदी सेवाएं ते साफ-सफाई सरबन्धी मानकें दा जायजा लैता। उ'नें मरीजं कन्नै गल्लबात करियै उ'नें दित्ती जा'रदी सुविधाएं बारै उ'दे शा जानकारी लैती। अस्पताल प्रशासन कन्नै गल्लबात दरान उपमुख्यमंत्री होरें एह निर्देश दित्ता जे आम लोकें दी स्हूलत लेई हर मुमकन गैह पुट्टी जा तांजे लोकें गी इ'नें सरकारी इदारे दा मते शा मता लाह हासल होई सकै।

<><><><><><>

Special Feature 11 years of Govt.

भारत च सेवा, सुशासन ते गरीब कल्याण दे सिद्धांतें थमां प्रेरित होइयै इक दहाके च महत्वपूर्ण तब्दीलियां आइयां न। आकाशवाणी समाचार तु'दे लेई पिच्छले 11एं ब'रें च प्रमुख खेत्तरें च सरकार दे जतनें बारै इक बशेश फीचर लेइयै आया ऐ। अज्ज, अस शिक्षा ते खेड्डें पर ध्यान केंद्रित करै करने आं – जेहड़े भारत दी अमृत पीढी यानि युवा पीढी गी सशक्त बनाने दी बुनियाद न। शिक्षा दे खेत्तर बक्खी चेचा ध्यान दि'दे होई सरकारै इक महत्वकांक्षी रूपरेखा तैयार कीती ऐ। 2014 थमां देसै च उच्च शिक्षा इदारे दी गिनतरी 51 जहार शा बधियै 70 जहार दे पार होई गेदी ऐ ते आईआईटी, आईआईएम ते एम्स ज्नेय इदारे दा बी व्यापक विस्तार कीता गेआ ऐ। इ'आं गै खेड्डें दे खेत्तर गी बी सरकारै बड़ी मती तरजीह दित्ती ऐ। खेलो इंडिया अभियान दे तैहत् 1 जहार शा मते सिखलाई केन्द्र खोले गेदे न ते 3 जहार शा मते युवा खड्डारिणं गी सलाना 6 लख 20 जहार रपें दी मदाद हासल होआ करदी ऐ।

<><><><><><>

Ramban Yoga

रामबन दे आयूष विभाग नै औंदे अंतर्राष्ट्रीय योग दिवस 2025 दी तैआरिणं दे रूपै च मैयात्रा दे समुदायक हाल च आयूष ते योग सरबन्धी इक जाग्रती सत्र दा सरिस्ता कीता। एहदा मुख्क मकसद मकामी लोकें, विद्यार्थिणं ते समाज दे होर दुए तक्कें दे लोकें गी योग गी अपने जीवन दा हिस्सा बनाने लेई प्रेरत करना हा। इस मौके उप्पर टीम दे सदस्यें लोकें गी आर्युवेदा योग युनानी सिदया ते होम्योपैथी दे योगदान ते महत्व बारे जानकारी कीता।

DA

जम्मू-कश्मीर सरकारै अपने मलाजमें लेई मेंहगाई भत्ते गी बधाने दा ऐलान कीता ऐ। जारी हुक्मै मूजब, मलाजमें लेई मेंहगाई भत्ते गी बुनियाद तन्खाहीं दे 53 फीसद थमां बधाइयै 55 फीसद करी दित्ता गेआ ऐ। एह बदलाव पैहली जनवरी 2025 थमां लागू मन्ने जाहग।

<><><><><><>

JMC SANJY

श्री अमरनाथ जी दी जात्तरा लेई जम्मू औने आहले श्रद्धालुएं दी सुविधा गितै जम्मू नगर निगम दे कमिशनर डाक्टर देवांश यादव होरें बक्ख-बक्ख थाहरें दा व्यापक निरीक्षण कीता। अपने दौरे दरान डाक्टर यादव होरें जम्मू रेलवे स्टेशन, बाहु प्लाजा आहली जेडीए पार्किंग, नानक नगर, गांधी नगर, बांके बिहारी मंदर ते होरनें थाहरें पर कीती गेदी तैयारिएं दा आंकलन कीता। एहदे अलावा उ'नें साफ-सफाई, सार्वजनिक शौचालयें ते होरनें सुविधाएं दी बी समीक्षा कीती।

<><><><><><>

World Environment Day

अज्ज कुल संसारी पर्यावरण दिव मनाया जा'रदा ऐ। एह ध्याड़ा प्राकृति ते धरती गी बचाने लेई पर्यावरण स्थाबै सकारात्मक कारवाई करने लेई कुल संसारी जागरूकता बधाने लेई मनाया जंदा ऐ। संयुक्त राष्ट्र पर्यावरण कार्यक्रम तैहत 1973 थमां हर ब'रे 5 जून गी धरती गी बचाने लेई जागरूकता बधाने लेई एह ध्याड़ा मनाया जंदा ऐ। इस ब'रे विश्व पर्यावरण दिवस दा विषय ऐ-प्लास्टिक प्रदूषण गी हराना।

<><><><><><>

Govt. Census

सरकार नै ब'रे 2027 च दऊं चरणें च मरदमशुमारी करोआने दा फैसला लैता ऐ। एहदे कन्नै गै जाति गणना बी कीती जाहग। मरदमशुमारी लेई रेफरेंस तरीक 1 मार्च 2027 होग। केंद्री गृह मंत्रालय नै आखेआ जे लद्दाख ते जम्मू-कश्मीर, हिमाचल प्रदेश ते उत्तराखंड दे बर्फीले इलाकें लेई रेफरेंस तरीक 1 अक्टूबर 2026 होग। ऐकड़ी रेफरेंस तरीक कन्नै मरदमशुमारी कराने दी अधिसूचना 16 जून गी आधिकारिक राजपत्र च प्रकाशत होने दी मेद ऐ। पिछली मरदमशुमारी ब'रे 2011 च दऊं चरणें च कीती गई ही। पैहले चरण च घरें दी सूची बनाई जाहग ते दुए चरण च आबादी दी गिनतरी करोआई जाहग। पैहला चरण अप्रैल शा सितंबर 2020 ते दुआ

चरण फरवरी 2021 लेई होग। ब'रे 2021 दी मरदमशुमारी बी इस्सै चाल्ली द'उं चरणें च करोआने दा प्रस्ताऽ हा। एह्दी सब्भै तैयारियां पूरी बी करी लैती गेदिआं हि'आं पर तदू मुख भरै च कोविड-19 महामारी दे प्रकोप करी 2021 दी मरदमशुमारी दा कम्म अगड़ा पाई दित्ता गेआ हा।

<><><><><><>

Bhaderwah Cultural Evening

जम्मू कश्मीर दे सैलसफा विभाग भद्रवाह आस्सेआ कल सांस्कृतिक संध्या दी मेजबानी कीती गई। इस समारोह च रंगारंग मकामी संस्कृति, संगीत ते हसी मजाक दी बौछार होई। माकामी ते राष्ट्रीय कलाकारें लोकें दा मन मोहने आलिऐं प्रस्तुतियां पेश कीतियां। आम लोकें ते पर्यटकें गी भद्रवाह घाटी च होने आले इस रंगारंग उत्सव च शामिल होने दा साददा दित्ता गेआ। कार्यक्रम दरान लोक गीतकार वकार खान ते रवि रघुवंशी हुंदे मन मोहने आले गीतें दा नंद लैता ते स्टेड-अप कमेडियन शाजी खान हुंदे हास्य किस्से दा नंद चुक्केआ।

<><><><><><>

Poonch Sports

युवा सेवाएं ते खेड्डें सरबंधी विभाग आसेआ पुंछ दे खेड्ड स्टेडियम च 14एं ब'रें शा घट्ट उम्री दिऐं कुड़िएं दे अंतर-ज़ोन जिला स्तर दे मुकाबलें दा आयोजन करोआया जा'रदा ऐ। कार्यक्रम दा उद्घाटन राजस्व मैहकमे दे एडीशनल डिप्टी कमिशनर मोहम्मद सईद होरें कीता। एह्दे च 11एं ज़ोनें थमां तकरीबन 300 खड्डारी खो-खो, वॉलीबॉल, शतरंज, कबड्डी ते चिड़ी-छिक्के दे मुकाबलें च अपना दम-खम दस्सडन। इस मौके पर बोलदे होई राजस्व मैहकमे दे एडीशनल डिप्टी कमिशनर मोहम्मद सईद होरें भलेआं हेठली सतह पर खेड्डें गी बढावा देने लेई मैहकमे दे जतनें दी सराहन कीती।

<><><><><><>